

劾文武官員疏

欽差閱視固原邊務兵科都給事中臣張棟謹

題爲邊方禁罔疎闊官守日隳亟糾壹貳以明有
法以儆有位事臣之奉

命閱視也會當邊事積衰之後

廷議更始之期貴在責實以規來效無爲貴洗垢
以索前愆故臣之出也業已盟心持大體不屑
屑於小節之求除大奸不區區於小利之察將
執此以報

命矣乃今巡歷所至而於鞏昌府徽州知州蒲朝柱
文縣知縣盧論西固城守備戴陞河州衛指揮
馮官不能不置喙焉夫知州文臣之小者知縣
則又小矣守備武臣之小者指揮則又小矣臣
何暇而及此耶蓋有說焉計寰寓之大陝西則
爲極西極邊不啻疆弩之末而自隴以西如臨
鞏之河州洮岷之階文又極邊極遠就陝西言
亦疆弩之末矣先年虜酋未犯洮河撫按出巡
不到各道另城而是以致文武官吏縱橫無忌

豈但

君門萬里卽所司亦在天邊斯民之含冤求訴者舉
足千里以故寧隱忍而止耳臣巡歷所至旣真
知各官之不肖豈容置而不論臣謹遵奉

勅諭會同巡按陝西監察御史周盤查得徽州知州
蒲朝柱櫟杜材庸斗筲器小文案積如丘山不
思清理吏書任其風浪莫解關防索常例則苛
及門子韓登科等人各壹拾兩扣羨餘則通同
庫吏馬三樂等日進百餘金徵錢糧公事也而

有寬限之名通縣老人田愛張應爵等各科伍
兩此劉五子可證接家眷私情也而有長脚之
派闔邑里長張忠實進祿等皆折百金此彭朝
禮可證假託條陳而向西廷等壹拾捌里每里
收稅銀百數皆係積書來近之設謀妄稱審役
而向王印等壹拾貳名每名嚇徃銀壹流全憑
積役強河之布網各院道批詞都東之高閣以
致小民之負寃情無由控各衛所逃軍若縱之
深溪以致衝邊之缺伍責有所歸課官箴業已
大壞招民怨亦且滋崇文縣知縣盧論政尚鷹
鷂曾藏狐鼠日用日取舖行而官價鮮給公費
公需里甲而民力難支拜

賀而鄉約張文成等貳拾捌名不到各罰粟穀伍石
王尚昌證編甲而保長焦廷倉等肆拾捌名見
面槩收常例壹星張千保證縱靈吏朱杰之橫
行則李南山有寃抱訴此在按院訪案可查憑
汙吏劉任之撥置則吳進性無罪擬徒此有撫
院翻招可據修公衙已議動錢糧矣而每壹事

派民夫壹名供役是何理也夫頭劉盛等籍籍有因赴考察旣私派夫馬矣而每壹吏帶里長壹名支應是何法耶里甲伯傾等紛紛有自理詞不辨是非槩追贖緩軍人庄庄等至扣月糧允納間閭之筋力已艱抽稅不分大小槩權緝錢行頭藺良等至輸貨物抵償蒸庶之脂膏欲盡考政則吏弊如天觀風則民愁如海以上貳臣均應照不謹例罷黜者也西固城守備戴陞心多狙詐性復狼貪當官柴尺無能攫利壹身

是智拾肆寨官軍每處派取新麥伍石稻米壹石皆吳伏興許九一經收玖百戶軍吏每名索受常例壹兩下程貳兩皆尚克成何保兒過送屬番占舟何啟賢等伍拾族每族要銀貳兩方請勘合致失夷心通舍齊整劉知孝等貳拾名每名勒銀伍兩方准伴送致違

貢限濫收詞狀則石阿藏以殺番樂戶潘林市民張尚禮皆以掠賣人口事事罰贖不下數金曲狗委官則反承英以署印百戶韓續千戶劉三

樂皆以管理中軍人人餽儀何止百兩軍士常
操法也每名納銀伍錢卽歇其操而操場鞠爲
荒圃軍件供役分也每名納銀捌兩卽免其役
而役使另用平民製食盒製茶鍾製菜碟油漆
匠日無餘工造酒器造臺盤造香盒瑪瑙石山
無遺利營務久廢物議尤騰河州衛指揮馮官
性同夷虜行比穿窬先任平川守備有罪而回
已成伏穴之鼠繼委歸德操守有故而去終爲
漏網之魚祇因鑽刺謀工遂再蹶而再起乃以

賁緣計得輒日縱而日驕任家丁馮三兒爲爪
牙而科索市民之財楊應先等皆負寃可據倚
軍餘武應宗爲耳目而劫取鋪行之貨郭朝奉
等實被害可查染指言家則均係公費皆其參
鑿王應祥之磁器特其小物耳藉言公用則上
城下襍皆其騙局石古兒之豹皮猶其往事耳
白塔寺遊賞敢挾娼婦張大喜張春嬌惠玉嬌
醉歌終日此張和尚陳國祥所共見也何其縱
欲如在梁家寺送行次婦女樂陳玉姐張春仙

周魁仙痛飲通宵此劉雙祿杜本義所同在也
如此宣淫不法良心已喪憲典難逃以上貳臣
均應革任仍行提問者也伏乞

勅下吏兵貳部再加查訪如果臣等所言不謬卽將
浦朝柱盧論罷黜戴陸馮官提問庶官邪肅而
邊事其有興矣臣愚不勝悚息待

命之至緣係邊方禁罔疎闊官守日隳亟糾壹貳以
明有法以儆有位事理未敢擅便爲此具本專
差百戶張希孔親齎謹題請

旨

萬曆拾玖年玖月初陸日題本月貳拾捌日奉
聖旨吏兵貳部知道欽此

題總兵病疏

欽差閱視固原邊務兵科都給事中臣張棟謹

題爲帥臣實病難支奉

旨先後互異遐方逸聽疑慮交加亟請

明斷并

勅該部就近推補以濟緩急事臣惟車之有執御也
舟之有舵師也兵之有三帥也蓋其重也

國家承平久而武事輕士直介官又溺於和議置
戰守不言茲茲持滿之士僅以供使令而馴至

於主帥亦弁髦視之矣古設壇之禮按轡之風云乎哉今言時也虜釁既開邊患孔棘所需於帥臣宜尚如重者臣巡歷事完暫駐慶陽造冊接得邸報該兵部壹本舉動輕率自認誅斥事覆奉

聖旨是尤繼先准回衛調理欽此不伍日又接邸報

兵部壹本奉揚

天威調兵馬分路出塞等事覆奉

聖旨西鎮正當進兵之際尤繼先止係目疾還着照

舊任事不必更易欽此臣身繫遐方不聞

廷議未審兵部始何見而覆其去繼何見而覆其留豈以壹時在事諸臣意見相左是非予奪無所適從此臣之所以疑卽今東虜還巢火真據海日窺視我

中國之舉動卽經畧鄭洛報疏亦云出師聲罪正惟其時時乎時乎在此一舉矣藉第令此舉不得火真之首何以廓清海上之妖氛而成西陲之右臂養虎貽患有不知其所終者今日之師

謂當出背水誓焚舟而主帥扶病提兵進退無據玩日愒月坐失便宜此臣之所以慮夫繼先之才勇身經血戰往臣在直所會薦將才與聞訪牒人無間言莫有出繼先之右者及臣巡歷河州始識其人叩之虜情隨聲而應咨以邊計抵掌而談且一念忠憤謂

國耻終不可忘和議終不可恃有垂紳結綬之徒所不能及者惟是弱體虺然語次綿悒壹日已傷壹目復病臣竊憂之及經畧鄭洛召赴西寧計議兵事而臣亦遂去河州走階文間途中凡參肆得繼先書皆稱病困暫止碾伯後復歸河州閉門息養近雖強勉部署出土門關而移文寓臣則云日疾轉劇行止仗扶軍務兵機未免坐誤情詞甚懇前已奉

旨准令回衛臣方刻時而望代者乃得今旨仍令任事不必更易殊不可曉意者

廟堂軫念西事之方艱計數大將之難得未忍輕棄壹繼先而不知繼先之病已實不可支畱之

不足以濟事或至於僨事留之非所以愛才乃所以棄才故臣謂有臣如繼先不可棄也有病如繼先不可留也使其五官不廢七尺猶存苟可以犯折衝而蒙矢石誰不爲

國家愛惜干城計而顧欲成其去耶蓋繼先之病自春歷夏徂秋而冬幾年許矣臣幾欲屬草而幾爲閣筆正惜其才未忍輕棄而日望其安好以勝今日之事不謂其病之轉深也雖病止於目而其精神頹耗顏色枯槁已厭厭泉下人當

此什伍勛勳之日必非繼先可以偃臥而指麾者不若聽其回衛調理便但師行在道枹鼓方鳴奪便飲飛呼吸爲歲旦夕之間若不可以從容待乞

勅該部就近擇取謀勇素聞曾經薦舉者作速推補刻定期限前來任事庶後急有濟而制勝可期西鎮幸甚臣愚幸甚緣係帥臣實病難支奉

旨先後互異遐方逖聽疑慮交加亟請

明斷并

勅該部就近推補以濟緩急事理未敢擅便為此其
本專差 親齎謹題請

旨

萬曆拾玖年拾月拾壹日題本月貳拾捌日奉

聖旨兵部知道欽此

奏繳閱冊疏

欽差閱視固原邊務兵科都給事中臣張棟謹

奏為邊務久廢閱視當嚴懇乞

聖明復

舊典專差遣以圖安攘事萬曆拾玖年冬月初陸日

臣欽奉

勅兵科都給事中張棟先因虜酋款貢邊患稍寧猶

慮人心懈弛每叁年閱視或遣大臣或差科臣或

就便委巡按御史乃各官多循虛套無益邊防近

採言官建議特遣京堂科臣相兼閱視攷邊各壹人期各盡心稽核振舉邊務茲特命爾前去固原地方查照先今事理將壹應邊務會同各該巡按御史從實查閱要見錢糧積下若干有無侵冒險盜增修若干是否完固兵馬添補若干果否精練器械整造若干果否堅利屯田鹽法曾否修舉收買胡馬有無實用及一切應行事宜悉查原議一一親履其地設法稽覈惟以事完爲度不拘限期毋但托付委官據憑文冊苟且塞責邊臣有能着

實修整著有勞績及踵襲故套搪塞誤事者俱從實具奏以憑賞罰其所閱之事務照依年分定以萬曆拾陸年正月起拾捌年拾貳月止叁年以前者不許追叙叁年以後者不許混叙其承委見任官員許分別舉劾凡舊管新收開除見在務要據實造報分別明白其京盤錢糧及勘覈工程未經奏報者併入奏報毋得草率了事及有所依違曲爲回護以負朝廷責實之意勅內開載未盡者俱查照兵部題准事理施行爾受茲重委須殫竭忠

誠悉心查覈仍遵照近旨務安靜省約正已飭下
痛革夙弊斯稱任使如或功罪不明奏報不實及
循習故套勞擾地方責有所歸爾其慎之慎之故
勅欽此臣承此

重命如駑馬承轅壹步壹憂人第見其馳驅艱窘而
猶未知其心之苦有自知之而不能言之者
夫此閱視也叁年壹遣矣非自今日而始遣臣
也亦玖人同遣矣非於今日而獨遣臣也臣何
爲而獨憂之苦至此則有說焉先年所遣閱視
者非臣今閱之時今日同遣捌人者非臣所閱
之地而最愚極陋誤承

特命臣之自反又非所舉閱視之人人壹已百人拾
已千臣不敢辭也而鶴長鳧短付受有限臣不
能強也蓋以閏叁月拾叁日入關肆月初從固
原閱始馴及靖虜臨鞏洮岷隴右關西以抵河
西所至會同巡按陝西監察御史李本固周盤
照依捌事逐一查閱謂當造冊

奏繳姑無他論卽

奏冊壹節臣與各邊已有難於盡同者矣先年以固原河西關西諸道分屬陝西巡按查閱以靖虜臨鞏洮岷隴右諸道分屬甘肅巡按查閱人各有見未免參差今將從此則遂有異於彼將從彼則遂有異於此將酌彼此而從其當則遂有異於昔臣最愚極陋豈有知識能加於昔年閱臣之上耶惟當虜燬既開之後

主上責實之時

明命在前胡不相畏每查閱壹事既不敢不求其實每造報壹事又不敢不從其實則錢糧有不在倉庫而報稱實在者兵馬有重造姓名而溢於實數者險隘有飾虛妄報而無當於實者器械有虛報多數而實無其物者屯田日見荒蕪猥云新墾鹽法商民兩累漫曰疏通諸如此類皆可刪也至如逆黨猶爲可異本鎮玖道惟靖虜壹道實係臨邊間有招回降人以承逆黨之乏猶可言也其餘地方原在腹裏逆黨不能從天而降從地而出而必以通丁番軍牽綴入冊竟

不思通丁番軍皆已造入兵馬數內輒又開為
逆黨壹人兩見此何說耶獨幸無胡馬耳聞諸
先年亦曾以茶馬抵數而後方摘去也此以知
各道報冊不足盡憑也臣謹查照舊式叅以已
見刪繁就簡備造文冊

奏繳而併陳其大畧如此今將前項緣由理合具

本專差承差王鳴遠親齎謹具奏

聞

萬曆拾玖年拾壹月初肆日題拾貳月拾叁日

奉

聖旨兵部知道欽此

奏報錢糧疏

欽差閱視固原邊務兵科都給事中臣張棟謹

奏爲謬陳錢糧稽查之法以杜奸欺事准戶部陝

西清吏司手本奉本部連送該本部題本司案

呈奉本部送戶科抄出閱視延綏邊務大理寺

右少卿兼陝西道監察御史王世揚題前事覆

行各邊督撫巡按轉行各該司道備將見貯倉

庫各項錢糧不拘叁年內外無分主客京運民

運屯鹽布花椿朋肉贓班價土兵局料糜糧等

銀及各銀易鹽屯事例等糧銀自分兩以上糧自升斗以上俱逐一開造備細明白聽候閱視查盤其各閱視如有已經查過參年內外毫無隱漏者俱照例造冊奏繳不必復查如有止查參年之內其參年之外未經清查者卽照延綏例各爲補閱另造以後參年閱視永爲遵行等

因題奉

聖旨是欽此欽遵備行到臣該臣奉

命閱視之初卽已頒定冊式通行各道將拾玖年正月初壹日以後新收新除倉庫錢糧盡數造送查閱隨於冊內附開明白無容補閱另造外但查固原等道尚有修邊糴本等銀糧不入冊不送查如王世揚所云者以爲先年閱冊從來不造此邊方之積弊也又該臣仍委漢中府推官鄧啟愚平涼府推官馬英分投再詣各倉庫重查冊報前來臣亦覆覈無異相應造冊奏繳爲照稽查錢糧惟在舊管新收開除實在數目明白卽爲無弊而舊管尤爲喫緊必舊管之

數一一皆實而後繫之以新收而後繫之以開
除收除復實斯實在者不問而知其爲實矣乃
今續查錢糧雖亦以拾陸年終爲舊管而先次
冊內實無此數今但據各倉庫開報舊管若干
臣旣無憑查其爲實與否也又安敢遂信爲實
而遽入繳冊耶會當更始之期事實得實自無
嫌於實報以故臣於冊內惟開實在數目俟下
次查閱方可據之爲舊管耳臣非不知錢糧之
管收除在肆柱不可廢也然能開具其所明而
不能開具其所疑正欲以此而明臣之不欺爲
此今將前項緣由理合具本專差承差王鳴遠
親齎謹具奏

聞

萬曆拾玖年拾壹月初肆日題拾貳月拾叁日
奉

聖旨戶部知道欽此

薦舉文武官員疏

欽差閱視固原邊務兵科都給事中臣張棟謹
題爲閱視事竣倣舊規參

新例薦舉文武官員以備責成以期來效事臣欽承
勅諭閱視固原邊務除已會同巡按監察御史李本
固周盤照依捌事查核明白造冊

奏繳外臣倣之舊規則參年以內文武諸臣有功
者舉有罪者劾而參之

新例則參年以外文武諸臣功亦竝舉罪亦竝劾旣

當合新舊而課其功罪又當分新舊而別爲舉
劾此今日閱視之臣所共遵者也但臣之承

命適在固原固原之功罪難言矣擿事廢弛臣旣已
閱視之矣除胡馬逆黨貳事不論將使臣以錢
糧多積爲功乎不敢也將使臣以兵馬克練爲
功乎不敢也將使臣以險隘皆固爲功乎不敢
也將使臣以器械盡利爲功乎不敢也將使臣
以屯政旣舉鹽法無滯爲功乎不敢也然則使
臣指事而按諸臣之罪乎臣又不敢也何也固

原雖列爲玖邊實在腹裏先年虜犯環慶則以
花馬池之失守也虜犯鎖黃川則以永安堡之
失守也卽如去歲虜之突入洮河則以甘肅之
間失守也藉令門戶扃鑰不疎虜雖強安能遽
窺吾寢闈哉故指固原爲重鎮則可指固原爲
衝邊則不可當夫和議未成之始兵容軍實已
未免少懈於各邊其在旣和之後又可知已去
歲洮河之事何怪乎其相顧失色束手待斃也
一時在事諸臣削籍者過半卽有未盡其事無

當於用者又先後被論以去臣欲借此而塞責乎不武欲舍此而苛求乎不仁於是進退維谷而將無據以報

命矣所幸兵部新題事例謂見在從事者惟以賢否分舉刺則今之見在諸臣皆失事之後以賢而推用者臣又安得不爲薦揚以備責成以期來效也敢列其姓名以

聞如靖虜兵糧道苑馬寺少卿兼僉事今陞苑馬寺卿王亮慨慷有氣誼踔躒有才情不遇盤錯之衝終負英雄之志固原兵備道副使楊時寧通和若叔縉厚方嚴名高重鎮之干城器擅清時之瑚璉分守河西道副使兼叅議李承志才華敏練器宇端詳嚴鎖鑰刁斗不鳴撫閭閻溝瘠頓起臨輦兵備道右叅政劉光國講論吉人振振君子才誠合而百廢具舉心行孚而一節彌敦分守隴右道右叅政田樂偉度軒翔弘才徹朗恩威竝用吏威民懷明斷相資風清弊絕分守關西道右叅政馬鳴鑿宏深之度博雅之才

四民懷樂利之仁一路樹旬宣之績洮岷兵備
道按察使李春光心事青天白日才華流水行
雲歷任衝邊良工獨苦試推時望開府何慙分
巡隴右道僉事郭萬里風裁雅持柱下之榮名
未泯霜標獨擅關中之炳業方新此皆文臣之
賢所當薦揚者也又如固原標下左營遊擊來
保發跡行間策勳素不負負枕戈之氣千里
懷伏櫪之思右營遊擊李寧涉歷邊境洞晰夷
情探虎穴若履戲場挽龍鈎獨誇神技分守靖
虜叅將蕭如蘭恂恂貌比儒生皎皎操同寒士
將門奇種內地長城舊洮州堡守備孟一陽脩
然七尺之軀徃矣千人之勇事無粉飾心有執
持固原衛指揮僉事趙相普持身不尚虛恢任
事罔辭勞怨年力正茂才守兼全靖虜衛指揮
僉事吳繼祖守甘茹藥技擅穿楊承家頗著孝
友之名臨陣能堅忠憤之氣紅古城操守楊應
魁朴茂無譁謹嚴有守白馬城能馴悍卒紅古
城最恤疲軍此皆武臣之賢所當薦揚者也又

如督理甘固糧儲戶部陝西司郎中胡應辰志
操清嚴才猷敏練共誇振世之高標可備干城
之妙選今雖離任而繼任本司郎中李際春前
徽未遠軍民鬱有遺思後效可期兵食終當永
賴此又部臣之賢併當薦揚者也又如鎮守總
兵官署都督僉事尤繼先抗志籌邊時勵裹屍
之氣抒忠報國頻懷繫頸之思無忝元戎真稱
名將此壹臣者近雖已病該臣疏

請放回調理然其才勇無雙當俟病痊亟行推用者

也又如巡撫陝西都察院右僉都御史今調甘
肅葉夢熊有文經武緯之才有安夏攘夷之畧
脩爾車馬已寒東寇羶裘城彼朔方定措西陲
衽席此壹臣者負大才畧宜大用之以究其底
蘊者也又如總督參邊兵部尚書兼都察院右
副都御史魏學會蹇蹇精忠可映天日恢恢宏
畧欲掃胡氛非直千萬里之長城真是伍百年
之名世此壹臣者不可無壹不能有貳宜信之
專任之篤以冀其成功者也再照書稱守法易

稱通變聖人並存以詔後世有以也先年閱視有舉有劾成規在焉臣於今日無乃非守法之道耶則臣之所值窮則變變則通之時也方在失事之後正須更始之期未見諸臣之功而強叙其功固謂之欺未見諸臣之罪而強入其罪亦謂之欺臣惟不敢欺是以寧棄成規而不得不曲從權變耳然惟臣可行於固原而槩行之於各邊則謬惟臣可行於今日之固原而欲行之於他日之固原則又謬此亦宜明言者信臣之見行臣之志其當與否臣不自知也若曰有舉無劾終屬市恩終屬怙法則臣復有以自解夫過去者不足責也將來者未可限也據見在而言如

勅諭所謂踵襲故套擔塞誤事者文臣孰有逾於經畧尚書鄭洛乎武臣孰有逾於立功總兵劉承嗣乎臣於洛也業有疏譏彈之矣於承嗣也亦有疏追論之矣言皆不售今欲舍此而區區苛求於監司路將之間以塞責云爾非臣之心也

非臣之職也是非毀譽臣已置之不勝悚忭待命之至緣係閱視事竣倣舊規參

新例薦舉文武官員以備責成以期來效事理未敢擅便為此具本專差承差王鳴遠親齎謹題請

旨

萬曆拾玖年拾壹月初捌日題拾貳月拾伍日

奉

聖旨該部知道欽此

薦舉委官疏

欽差閱視固原邊務兵科都給事中臣張棟謹

題為遵例薦舉委官以重邊政事蓋閱視事竣薦舉承委官員者舊例也又該臣與通政使司右通政穆來輔等題為仰承

新命共竭愚衷謬陳閱視未盡事宜以便責成事該兵部覆奉

欽依內一款看得邊事之科條甚夥閱臣之耳目難周勢不得不佐以委官如得剛方明練之才而

又不在閱屬之內者委之甚善卽係閱屬而能
不畏大吏務竭精思搜剔靡遺檢舉咸當者委
應一體薦揚破格優叙如有不稱任使或徇情
負託者自應叅治改委相應載入

勅內其薦者應作正薦叙者應爲優叙仍咨吏部知
會等因奉

聖旨依擬着實行欽此欽遵臣惟陝西肆鎮惟固原
壹鎮玖道事體較繁非特事體之繁已也卽途
路之遠舉足千里臣以一身雖戴星出入自難

卒遍所藉於委官誠不淺矣顧肆鎮委官皆取
足於捌府之佐臣旣不能多取而又不取泛取
僅僅取用貳臣皆實見其克稱任使也不敢不
遵例薦揚於

皇上之前漢中府推官鄧啟愚公平正直冲粹端方
練習金科則老吏退後堅持冰節則處子讓前
湘江衡嶽之英清廟明堂之器平涼府推官馬
英凝重不浮貞固有執當機遊刃而裕擿伏畫
象而神有不練不兢之風負惟允惟明之譽此

貳臣者臣不敢以承委之故而遂爲無試之譽也自閏參月至今拾壹月東西奔走凡捌越月祁寒暑雨胼手胝足真有一息靡寧者臣復尾之而行隨處覆閱稍有輕忽卽面責之不少假借蓋貳臣不幸而見委於臣臣實幸而委及貳臣矣在鄧啟愚參任兩考骯髒多年前前寃未雪後績已成在馬英歷官伍載資望已深行取未及遺珠堪歎皆當擢用之時伏乞

勅下該部破格優處使實心任事者咸有所勸非特爲貳臣也亦所以風邊臣而欣之任事也臣不勝懇切仰望之至緣係遵例薦舉委官以重邊政事理未敢擅便爲此具本專差承差王鳴遠親齎謹題請

旨

奉 萬曆拾玖年拾壹月初捌日題拾貳月拾伍日

聖旨該部知道欽此

薦舉鄰邊有司疏

欽差閱視固原邊務兵科都給事中臣張棟謹

題爲遵例薦舉鄰邊有司以重邊政事臣惟邊事

貴在得人工師之爲巨室也棟梁柱石固必求

大木以勝之矣卽壹榱壹桷或不適於用終難

以成輪奐之美故先年閱視舉劾及於鄰邊有

司殆非無意若乃舉而濫及於腹裏則爲市恩

劾而波及於腹裏則爲苛罰非閱視舉劾有司

之本意也臣巡歷所至採民風以覈吏治頗有

得於見聞之真者除鞏昌府同知張居敬推官
洪國材皆在臣屬皆係賢官而爲甘肅閩臣李
汝華取赴河西委用則汝華必且優薦臣不敢
叙及以涉市恩外謹摘其見在鄰邊之賢有司
疏名於

皇上之前臨洮府知府岳維華曾次磊磊落落操修
戰戰兢兢法不滋章而一庭秋凜恩多沾濡而
四境春溫鞏昌府知府郭師古長駕遠馭之志
超凡軼衆之才談邊則八面生風爲民則百堵

皆作平涼府知府徐濂裊身粹潔蒞事精詳處
宗民交橫之時而調停允當領屯牧兩疲之郡
而撫摸偏周靖虜衛監收通判田選念念動以
天真言言出自性府一塵不染百度惟貞兩造
無冤三軍有頌會寧縣知縣延論性嚴毅而有
執才疏暢而不偏處荒邊拮据罔怠當孔道意
氣常閑隴西縣知縣李守謙苦心以立政約已
以惠民政無叢脞之虞民有廉平之戴清水縣
知縣王忠顯志端以一才秀不羣猶然有赤子

之心真得夫牧民之體安化縣知縣盧夢麟丰
資清俊器度寅恭振刷勤而城社不畱憑鼠招
揀切而郊原日見歸鴻以上捌臣皆鄰邊有司
之賢所當薦揚以備擢用行取之選者也夫有
司多矣臣所轄玖道在鄰邊者亦不少矣而所
薦僅僅至此非刻也蓋與捌事無大相關則寧
置之防其濫耳然亦有舉而無劾何耶臣前所
劾壹同知壹通判壹知州壹知縣皆鄰邊有司
也卽有遺焉則撫按之備考察疏入矣臣之言

而有出於撫按之外也猶云各舉所知以供吏
部之裁擇也臣之言而不能有加於撫按之外
又何以言爲今之世率局於拘攣而不肯破有
貳人焉皆不肖可去也乃以舊例止論壹人則
遂有幸而免者有壹人焉未至不肖可去也乃
以舊例必論壹人則遂有不幸而不免者臣往
爲縣令兩經大計覩此世套竊以爲歎他郡自
有平原自無今竟可行否乎臣敢因而併及之
緣係遵例薦舉鄰邊有司以重邊政事理未敢

擅便爲此具本專差承差王鳴遠親齋謹題請

旨

萬曆拾玖年拾壹月初捌日題拾貳月拾伍日

奉

聖旨該部知道欽此

張可菴先生疏稿卷之四